



Terenga 3: Hōtaka 41 – Kīwaha

He Mihi

E te hokowhitu a te reo Māori, nau mai anō ki te papa o Ako. Ki konei tātou pakanga ai kia ora tō tātou reo ki waenganui i ngā uri whakatupu kei te pikipiki mai. Ka mutu, ko tētehi tohu o taua ora, ko tōna tika, ko tōna rere, ko tōna wairua Māori anō hoki.

Hei Mahi Whakarongo

He tīpakonga waiata te kiriata poto o te rā nei hei whakamaunga mō ō tātou taringa. Ko te kaiwaiata, ko Te Ahorangi Winitana. He waiata tēnei i titoa ai e ia i tana kuhunga ki te whare o Pūkana hei kaiwhakataki. Anei rā ngā pātai hei whakautu mā koutou:

- 1) He aha te āhuetanga whakamataku e waiatahia nei e ia?
- 2) Mā te aha e eke ai te tangata ki ngā taumata?
- 3) He aha ana kupu whakahau i a ia anō?

He Whakamārama

He kīwaha te kaupapa o te hōtaka i te rangi nei.

Nā whai anō! = *It's no wonder!*

Tirohia te tauira e whai ake nei:

I tupu ake a Te Aho Winitana rātou ko ana tungāne, ko ana teina i roto i te reo me ngā tikanga.

Nā whai anō e eke nei rātou ki ngā taumata i te ao pāpāho Māori.

Ani: Mō taku hē. I pau te hiko o taku waea inapō.

Pio: Ā...Nā whai anō i kore ai koe e whakapā mai.

Kere: I mate te kurī a Tama i te ata nei.

Pare: Nā whai anō i pāpōuri ai ia i tana taenga mai.

He rite te tikanga o tēnei kīwaha ki ngā kupu nei, Koinā tonu te take.

Hei Mahi

Tuhia te otinga o te kōrero. Whakamahia te kīwaha 'Nā whai anō' hei tīmata i tō rerenga.

1. I tae tōmuri ngā ākongā ki te karaehe.
2. I tino karawhiu te marangai i te rangi nei.
3. He mea poipoi te tamaiti rā e tana kuia me tana koroua i tō rātou papakāinga.
4. Kua pau te penehīni o te waka.
5. He turi te kuia rā.

He Whakautu:

1. Nā whai anō i puku ai te rae o te kaiako.
2. Nā whai anō i whakakorehia ai te kēmu.
3. Nā whai anō e Māori nei te reo me ngā whakaaro.
4. Nā whai anō e tū noa iho nā i te taha o te rori.
5. Nā whai anō i kore ai e tahuri mai.